

ტყვიავეში საზოგადოებრივი ცენტრი გაიხსნა

09 სექტემბერი 2016

გორის მუნიციპალიტეტის სოფელ ტყვიავეში საზოგადოებრივი ცენტრი გაიხსნა. შიდა ქართლში ეს რიგით მეოთხე ცენტრია. გახსნას იუსტიციის მინისტრი თეა წულუკიანი, მხარის გუბერნატორის მოვალეობის შემსრულებელი იოსებ ოქრომელიძე და ადგილობრივი თვითმმართველობის წარმომადგენლები ესწრებოდნენ.

მოსახლეობა აქამდე მომსახურების მისაღებად მიმართავდა გორის იუსტიციის სახლს, ამიერიდან კი ადგილობრივები სოფლიდან გაუსვლელად შეძლებენ 200-მდე საჯარო და კერძო მომსახურების მიღებას. ამასთან ერთად ისარგებლოს უფასო ინტერნეტით, საკონფერენციო დარბაზითა და ბიბლიოთეკით.

„შიდა ქართლში მეოთხე საზოგადოებრივი ცენტრი გაიხსნა. ამიერიდან ადგილობრივი მოსახლეობა შეძლებს მარტივად და სოფლიდან გაუსვლელად ისარგებლოს სხვადასხვა სერვისებით, მათ შორის კერძო მომსახურებით. ასეთი ცენტრის არსებობა მნიშვნელოვანია, რადგან ეს ხელს შეუწყობს სოფლის განვითარებასა და მოსახლეობის სამოქალაქო ჩართულობას.“ – აღნიშნა გუბერნატორმა.

ცენტრი სოფლების: ფლავისმანის, მარანას, ფლავის, ტირძნისის, ბროწლეთის, ერგნეთის, თერგვისის, მელვრეკისის, მერეთის, კარბის, ქერეს, ზარდიაანთკარის, გუგუტიაანთკარის, კოშკას, დიცის, ქორდის, არბოს, ძევერას, სათემოს, ქინწისისა და შერთულის დაახლოებით 20 000-მდე მოქალაქეს მოემსახურება.